

Tico Oduber:

Nos dande no ta pa placa pero pa tradicion di Aruba



ORANJESTAD - E di 36 Festival di Dande tabata dedica e aña aki na Albertico "Tico" Oduber acordeonista y na Bruno Koolman musico y cantante d Dande.

Tico Oduber a nace dia 11 di September 1953 y ta sali di un famia hopi musical, esta di generacion pa generacion.

Cu 8 aña di edad el a cuminsa mishi cu acordeon y den un par di dia ya el a saca melodia.

Tabata su omo Ety Willems cu ta acordeonista y na mes momento drechado di acordeon cu a siña Tico controla e instrumento y saca melodia.

Algun tempo despues ya

Tico por a toca algun pieza y dande.

No por keda sin menciona cu Pedro Kock "Ciego Maraviyoso" a siña Tico compas pa saca pieza y den tempo relativamente cortico cu 8 aña Tico a sali hunto cu su ruman grandi Ben cu paranda di dande den su bario Pabilon cu un grupo di hoben di bario den oranan di mainta y bao guia.

Despues di varios aña el a haya permiso di su mayornan pa sali cu paranda despues di tiro di aña, pero mester ta bek na cas 5 or pa 6 or di mainta.

"Mi prome paranda mes tabata cu Ronny Croes y nos a sali despues di tiro y a pasa masha hoi cas y tabata un alegria con e hendenan ta mirami toca acordeon.

Mi tin mas di 40 aña consecutivo cu dande tanto na Aruba como na hulanda. Mi a pasa dande cu diferente musico y mi no por keda sin menciona cu Pabilon cu ta nos bario a produci hoi bon musico, tanto riba acordeon como fio; entre otro mi abuelo Chatin Willems, Minguelito Willems cu ta violista, mi omo Eti cu acordeon, Felis y Mo Kochik, mi tanta mes cu ta bon



musico y alavez artista pa loke ta obra di man y un solo palabra tanto mi mama como mi tata nan famia pa musico dominando tur instrumento", Tico a relata.

"Mi primo y sobrinonan tambe ta musico, nos ta un famia musical cu ta domina tur instrumento y tambe canta. Pabilon a produci bon musico y riba nan mes, sin kita cu algun di nan a sigui cierto les di musica.

Ta hopi pa menciona di e musiconan di Pabilon, entre otro Leo Yarzagaray riba acordeon, Shona Lampe cu acordeon y violon, Fichi Kock tambe den e grandinan cu ta domina varios instrumento musical".

Karel Croes tabata cu Tico den parandanan di dande. Su primo Endy Willems tambe a logra hopi pa musica di e bario y semper a yuda Tico. Tico a toca dande tur parti di Aruba y semper a wordo ricibi cu porta habri. Tin cas cu ta pidi pa dal dande na porta si acaso cas ta cera, pa nan habri porta pa ricibi e dande.

"Nos dande no ta pa placa pero pa e tradicion Arubano, nos no ta preocupa pa ricibi placa den sombre. Tin cas cu nos ta haya algun larga y tin cas cu ta duna algo mes, pero tur cas ta un placer pa bishita cu nos paranda di dande", el a bisa. Tico ta corda e prome festival di dande den Connie Francis club na Santa Cruz unda el a toca cu Tipico Santa Marta. Connie Francis tabata asina yen cu no por a move ningun caminda.

Tico a participa den tur sorto di festival tipico y di folklore riba nos isla y tin mas o menos 20 aña cu e ta un di e caranan cu su tipico den antes Watapana Festival cu a bira despues Bon bini Festival.

El a bay biba na hulanda pero tur aña tabata den parada sea na cas di conoci of den festival. E tipico di tico a gana varios festival di dande na hulanda y festivalnan dedica na Aruba, entre otro San Juan y tambe ranchera.

"Nos tabata tin un bon agrupacion musical cu yama Guadirikiri. Mi a toca na alemania, Francia, y Belgica. Cu masha hopi agrupacion grandi cu a yega Hulanda mi a toca cu nan mano a mano y te hasta mi a yega di reforza varios banda musical.

"Nos agrupacion a saca varios cantante ganador den festival di dande na Hulanda; ito Kelly, Gina Thijsen, Anthony Kelly, Jeffrey Kelly, Marlon Maduro y na Aruba Rosalina Kelly. Na Aruba nos a logra varios premio den festivalnan grandi", Tico a conta.

Durante su añanan na Hulanda el a toca na varios parti di europa y na television y na radio. El a toca pa sr. Tirso Steba, Rudy Herrera, Ludwina Booi, Julian Koko, Jonathan Vieira, y Theolindo Lopez cu tabata un di e grandinan cu a yude hopi na Hulanda.

"Si mi por a lubida algun number, dispensa mi pero mi ta gradici tur cu a yudami cu awe Tico oduber tin un bon number tanto na Aruba como na Hulanda", el a termina expresando.